

<p>Anueit qu'ei vadut Nadau</p> <p>Anueit qu'ei vadut Nadau En un plan petit ostau, Hens ua crampa desaparada, De palha pasimentada. <u>Anem ! correm !</u> <u>Véder Jèsus a Betleèm !. (bis)</u></p> <p>" Deishem ací los esclòps Tocaderas e barròts, Los esclòps e las empalhas, Las cauçes e las quincalhas. "</p> <p>" Que'u pòrtas tu, Bertomiu ? - Un pinsan, un cotorliu, Ua piga e ua parra, Fritas en un cap d'esperra "</p> <p>"Que'u vas tu portar, Jantin ? - De pomas bèth sacotin, D'esquilhòts ua manòta, De castanhas ua pochòta. "</p> <p>" Que'u portaràs, tu, Migàs ? - Bon tròç de hromatge gras, Dab un braçat d'esteròtas, Ta'u har cauhar las manòtas"</p> <p>Los pastors son arribats, Dab los esclòps tots herrats. L'un portava ua coqueta, L'aute qu'avè ua cugeta.</p> <p>En aceth petit ostalet, Qu'an trobat lo Nadalet Cochat au ras de Maria Dab palha darrèr l'esquia.</p> <p>Que plau ad aqueth ostau, Lo vent qu'i boha com cau. E quan honeish la grasilha Ací tot que's descavilha.</p>	<p>Sent Jausèp lo brave omiet Qu'a trobat lo bon secret. De hicar tapons de palha Aus horats de la murralha.</p> <p>Tres grans reis son arribats, Plan vestits, beròi flocats. Com non sabèn pas la via Qu'ei un lugran qui'us amia.</p> <p>Quan arribèn a l'endret Lo lugran s'arrestec sec. Eths vedón per la clithèra Jèsus qui jasè per tèrra.</p> <p>Cantem tots este advent</p> <p>Cantem tots este Advent, Nadau devotament, A l'aunor de Maria Qui'ns pòrta frut de vita, Qui'ns deu a tots salvar E Satan surmontar.</p> <p>Qu'ei dehens un preseï Qui deu nàisher lo Rei, Shens nada companhia, Que la soa mair Maria E Jausèp, lo praubet, Tot tremolant de hred.</p> <p>Jamei un fèit tan gran Que nasca un enfant De mair filha e puncèla : Jèsus la gran novèla ! Cantem dongas com cau Devotament Nadau.</p> <p>Retira't tu, Satan ! Non hàcias lo cascant, La tempèsta ei passada, La patz se'n va cridada, Los in.hèrns subjugats, Los captius desliurats.</p>	<p>Chut ! Chut !</p> <p>Lo hilh de Diu, anueit vadut, Hens ua establa qu'ei tot nud; Quan lo volón hicar la pelha, Jausèp digó: l'Enfant somelha.</p> <p><u>Chut, chut, chut.</u> <u>L'enfant drom.</u> <u>Non haciatz pas brut. (bis)</u></p> <p>Los anjolets l'an anonçat, E dens los aires l'an cantat. L'un que soava ua trompeta L'aute qu'avèva ua pipeta.</p> <p>Un sabatèr escarvelhat, Voló cantar "Magnificat" Mes quan començava la nòta, Jausèp que'u gahè la calòta.</p> <p>Un capuishin drin adromit, Que voló bailar lo petit. Tant qui'u gratussava la nuca Jausèp que'u tirè la perruca.</p> <p>Un talhur bien apolingat Tà'u vestir que s'ei presentat, Mes quand lo vòu mesura, Jausèp que'u pren la <i>chevelura</i>.</p> <p>Un vielh maçon tot pietadós Vòu boçar tots aqueths traucons. Mes au primèr còp de truèla, Jausèp que'u gaha la bretèla.</p> <p>Un menusèr viengut esprès, Que voló har un petit brèç. Mes au primèr còp de garlòpa, Jausèp que'u gahè la culòta.</p>	<p>Per ací près que i a bueu, De que non minja e que non beu. O' n'ei pas que non n'aja enveja Mes arrés que no'n ne carreja.</p> <p>Un asolet qu'ei estacat D'eth, arrés que non n'a pietat. Quand lo tiran per la cordeta, Lavetz lo noste aso que... canta.</p> <p>Un manescau que t'arribà E l'aso que voló herrar; Quan començà la trica-traca, Jausèp que'u tirà la casaca.</p> <p>Un procurur dab dus ussièrs Viengó dab un sac de papèrs. Tant qui legè la procedura, Jausèp que'u dè sus la figura.</p> <p>Las pastoretas en dançant, Entà l'adorar qu'arribàn. Mes Jausèp que'us digó: mainadas, Non haciatz pas tant de gambadas !</p> <p>Los pastorets mau avisats Dab los esclòps que son entrats. Jausèp qu'èra darrèr la pòrta, Que'us te flanquè un còp d'endòrta</p> <p>Fica « Cantem! » hèita entà l'Aròu de La Tireuse en noveme 2008 per Joan Pau Latrubesse president de La Civada.</p> <p>Rensenhaments : Ostau Bearnés. Maison de la Cultura Bearnesa 05.59.30.60.34.</p>
<p>Pastors e pastorèlas</p> <p>Pastors e pastorèlas, Quan an sabut Las tan bèras novèlas D'un Diu vadut, Qu'an anat véder aqueth enfant, En còrrer, en sautant, Entà'u saludar. <i>O gue ! lan la, lanlèra</i> <i>O gue ! lan la.</i></p> <p>Caton, la brava filha, Son frair Hilhót, Dab tota la familha Qu' an pres lo tròt, Hèn au qui mei lèu i serà, Entà Diu pregar De'us drin ajudar.<i>O gue...</i></p> <p>Mes autanlèu qui entran Dehens l'endret, Lo mainatge que tròban Shens lutz ni huec. Esmavuts de tant de praubèr, Cadun que plorè Au lòc de cantar. <i>O gue...</i></p> <p>Quan lor tan trista mina Jausèp vesó, Que'us ve virè l'esquia E que'us disó : " Si vienetz ací tà plorar, Ve'n podetz tornar O recomençar." <i>O gue...</i></p> <p>Sus aquera paraula, Lo gai Janet Deu sac qui a sus l'espatla Tira un fiulet, E jòga aires tan, tan polits, Que grans e petits E's hican a dançar.<i>O gue...</i></p>	<p>Un còp las calaminas Hòra d'estuth, De cent cançons divinas S'audeish lo brut. Cadun qu'aufreish au petiton Cò qui a de melhor E va l'adorar. <i>O gue...</i></p> <p>Tà celebrar la hèsta, Los pastorets, Lo majorau en tèsta Deus lors tropèths, Que'n van, esberits e gaujós, Olhas e motons A Diu presentar. <i>O gue...</i></p> <p>Pastors sortiam deu lheit</p> <p>Pastors sortiam deu lheit, Anem en allegria En Betleèm anueit, D'après la profecia, La qu'ei vadut Lo hilhet de Maria Per noste salut.</p> <p>Los anjos dens los èrs, Que laudan sa neishença, E de mila concèrts, Plens de rejouïssença, Que hèn, que hèn, Dab ua senta licença, Tremir Betleèm.</p> <p>A lur imitacion, Pastors, sus las guitarras, Joguem a lor aunor, Las mei bèras fanfaras, E puish, que cau Anar dab las cimarras Dret a son ostau.</p>	<p>Haut ! haut! Peiròt desvelha't !</p> <p>Haut! Haut! Peiròt, desvelha't ! Vòs audir lo bèth son ? Qu'ei çò qui t'assomelha ? Oh ! lo charmant claron ! Lo còr que'm disè bitara Qu'aci son los pastors. E acera lutz tan clara La cloqueta, los bastons, Be'm hèn véder ua cimarra Cargada de flors !</p> <p>Digas, Peiròt, adara Ent'on tira Guilhem? B'audi gran tintamarre Deu costat de Bethleèm. Avancem-nse sus la via Entà que posquiam lèu Véder Jèsus, lo Messia, Tot aimable en son bercèu: De Maria a pres lo dia Per nos dar lo cèu !</p> <p>Parla, tu, Nicodèma, Qu'ei çò qui'u vas portar ? Jo pòrti drin de crèma, Que l'i voi har minjar. Peirolet, vin borret, Arnauton, escauton, Dominique, drin de mica, E Jacolet, un panèth Dab ua bèra borrasseta Qui'u vira lo hred.</p> <p>Hilhòt de Diu aimable, Recebetz noste còr ! Bèth enfant adorable, E ! quin se pòt aquò ?</p>	<p>Sus lo sòu shens bercèu Lo cap sus un calhau, Drin de palha per tavalha, Sus la nèu, Rei deu Cèu, Shens huec ni nada avitalha Quin ètz vos vitau ?</p> <p>Cantem dab allegria ! Sona, Arnaut, deu claron A la glòria deu Messia, Jòga, Marc, deu vriulon. Cà'i Maria, <i>je vous prie</i>, Vos tanben, Jausepon, Cantatz ara la fanfara Dab Peiròt e Joandon. Guilhem, jòga la guitarra Noël au Salvador !</p> <p>Deu cèu las clarinas</p> <p><u>Deu cèu las clarinas</u> <u>Qu'anonçan matinas</u> <u>Ras deu rei vadut. (bis)</u> <u>Uei qu'ei lo gran dia,</u> <u>On vien lo Messia</u> <u>Per noste salut. (bis)</u></p> <p><u>Quitem nosta jaça</u> <u>E seguim la traça</u> <u>De tan de pastors. (bis)</u> <u>Leishem las aulhetas</u> <u>Gahem las musetas</u> <u>E correm s'i tots ! (bis)</u></p> <p><u>N'ei pas l'escurada</u> <u>Ni la gran gelada</u> <u>Qui'ns pòt arrestar. (bis)</u> <u>Oc ! Que volem còrrer</u> <u>Dinc a que demore</u> <u>Suu pè lo lugran. (bis)</u></p>